

Pader Rudy Lampe:

"Mi to ta kere cu por soluciona problemanan di Aruba pa medio di confrontacion o violencia"

Caso sumario di De Veer
contra Lampe posponi

ORANJESTAD(AAN): -- E caso sumario cu Eduardo de Veer a lanta contra pader Rudy Lampe y cu lo a sirbi awe pa 9:30'or di mainta a keda posponi despues cu Eduardo y Gerardo de Veer, pader Lampe y Obispo Secco a sinta na mesa ayeratardi na Pastorie di Playa riba iniciativa di e De Veernan.

E caso no a keda cancela sino posponi y e intencion ta pa pader Lampe rectifica e acusacionnan cu el a lanza siman pasa, tempo el a bisa cu Eduardo de Veer a permiti pa hendenan tira obhetonan riba e manifestantenan di Plataforma Accion Dushi Tera for di bentananan di Sonesta Hotel.

Pader Lampe a bisa ayera cu e caso sumario cu señor De Veer a lanta contra dje tabata basa riba un malentendimiento como cu ningun momento el a declara cu ta Eduardo y Gerardo de Veer mes lo a tira boter o piedra durante e manifestacion.

Obhetivo di su declaracionnan, asina pader Lampe a splica, no tabata pa muestra dede riba e De Veernan o nan empresa sino pa pidi pa bin cu un investigacion riba e posible papel cu Estado Hulandes a hunga den cierto actonan.

Segun pader Lampe, ta logico cu si obhetonan a wordo tira for di camber di hotel mes, e De Veernan no por wordo teni personalmente responsable.

Ora a puntra Rudy Lampe si a tira cu cos for di e hotel o

no, el a contesta cu tin testigo cu a mira obhetonan sali for di cambernan di e hotel pero cu ningun momento ta corecto pa involucra e Veernan den esaki.

El a sigui bisa cu: *"Pa mi ta sumamente importante pa nos soluciona cualkier malentendimiento o conflicto via dialogo. Mi ta semper masha dispuesto pa haci esey. E accion "Respeta Mi" di Plataforma Aruba Dushi Tera tabata pa pidi pa respet pa Ley y democracia y mi no ta kere cu pa medio di confrontacion o violencia por bin solucion pa problemanan di Aruba. Confrontacion y violencia no ta cumbini ningun Arubiano y pesey mi ta contento cu ayeratardi pa medio di dialogo nos a yega un comprendimento pa medio di dialogo sin cu tabatin mester di confronta otro den Corte".*

Pader Lampe a papia ayera tambe di su detencion cu lo no a bay de acuerdo cu Ley: *"Na prome lugar mi a wordo deteni riba mi tereno. Djey mi a wordo hiba Warda di Polis y mi no a haya asistencia di un abogado, apesar cu mi a pidi pe. Despues sin cu mi tabata condena, mi a wordo hiba KIA. E siguiente dia ora mi a presenta na Warda di Polis, nan no tabata kier a tuma mi verhoor den presencia di mi abogado y esey ta un violacion di e Buki di Ley Penal nobo di Aruba. Tur ta elementonan cu ta muestra cu den e proceso aki nos Leynan y derechonan humano a wordo viola".*